

Issittumi imaani uuliakoornermut upalungaarsimanissamut akiuiniarnermullu tunngatillugu suleqatigiinnissaq pillugu isumaqatigiissummut Kunngeqarfik Danmarkip akuersinerata Namminersorlutik Oqartussanit ilalernerqarnissaa pillugu Inatsisartut aalajangiiffigisassaattut siunnersuut

(Inuussutissarsiornermut Aatsitassanullu Naalakkersuisoq)

Saqqummiussissut

Siullermeerneqarnera

Issittumi Siunnersuisooqatigiinni ministerit Nuummi 2011-imi maajimi ataatsimiinneranni Task Force, nunani tamalaani isumaqatigiissummik Issittumi imaani uuliakoornissamut upalungaarsimanissamut akiuiniarnissamullu tunngassuteqartumik inerisaasussaq pilersinneqarpoq.

Issittumi imaani uuliakoornermut upalungaarsimanissamut akiuiniarnermullu tunngatillugu suleqatigiinnissaq pillugu isumaqatigiissummut Kunngeqarfik Danmarkip akuersinerata Namminersorlutik Oqartussanit ilalernerqarnissaa pillugu Inatsisartut aalajangiiffigisassaattut siunnersuut matumuuna Naalakkersuisut sinnerlugit saqqummiuppara.

Isumaqatigiisut uuliakoornermut imartani pilersimasumut imaluunniit aarlerinartorsiorfitsilersimasumut sammitinneqarpoq. Taamaattumik isumaqatigiissummi suliaassarfiit arlallit kallarnerqarsinnaapput, assersuutigalugu umiarsuarmit, sinerissap avataani uuliasiorluni ingerlatanit aamma nunami aallaaveqartumik ingerlatanit uuliakoornert. Isumaqatigiisut nunat nammineq nunaminni imartani kiisalu imartani eqqaminniittuni nunami namminermi inatsisinik atortitsiviunngitsuni alapernaarsuinissamik pisussaaffiliivoq.

Uuliakoortoqarsinnaanera akiorsinnaajumallugu naalagaaffiit tamarmik immikkut suliffissuit umiarsualivinnik, uuliasiornermik umiarsuaateqarnermillu ingerlataqartut attuumassuteqartut suleqatigalugit nunami namminermi upalungaarsimasuutitanik inerisaassapput ingerlatitsissallutillu. Upalungaarsimasuutitaqarneq pisortanit imaluunniit namminersortunit ingerlanneqartuusinnaavoq, kisianni atortunik, sungiusarnermik, pilersaarusiornermik aamma oqartussaasut suliniarnerannik naleqquttumik nunami namminermi ataqatigiissarinermik imaqaassalluni. Sumiiffiit uuliakoornermik pisoqarfiusinnaasutut ilimanaateqarnerpaajusut aallunneqassapput aamma aallussineq pinngortitami ataqatigiinnerit immikkut ittut qanoq iliornikkut illersorneqarsinnaanersut pillugit isumaliutersuutitnik imaqaassaaq.

Uuliakoortoqassagaluarpat tamatuma kingorna mingutsitsisoqarluni, nunap kallarnerqartup nunat sinneri tassani imartanik mingutsitsinissamik aarlerinartorsiorfiusinnaasut ilisimatissavai. Annertunerusumik kuutsitsinermi atsioqataasut tamarmik ilisimatinneqassapput. Isumaqatigiissummi aamma nunat ataatsimoorullugu sungiusarnermik ingerlatsinissamik pisussaaffilerneqarput.

Mingutsitsinermi isumaqatigiissummik atsioqataasimasooq isumaqatigiissummik atsioqataasimasunit allanit ikiorserneqarnissamik piumasaqarsinnaavoq, assersuutigalugu siunnersuineq, teknikkikkut tapersiineq, atortut sulisut. Aallaaviusoq tassaavoq nuna ikiorneqarnissamik piumasaqartoq nammineerluni tassunga atatillugu aningaasartuutitnik tamaginnik akiliissasoq.

Kalaallit Nunaanni aatsitassarsiorluni ingerlatanut tunngatillugu, aatsitassanut ikummatissanullu inatsit malillugu akuersissutinut pisinnaatitsissummik pigisaqartut, uuliakoornikkut mingutsitsisoqassagaluarpat upalungaarsimanermut, akiuiniarnermut saliinissamullu akisussaasuupput. Pisinnaatitsissummik pigisaqartoq ajoqusiinernut, tamatumunnga suna peqquaanersoq apeqquaatinnagu, akisussaasuvoq.

Uuliasiorluni misissuinermi qillerinermut atatillugu piunasaqaataassaaq pisinnaatitsissummik pigisaqartup upalungaarsimaneq pisariaqartoq pilersissagaa, assersuutigalugu nunarsuarmi ingerlateqatigiiffimmut uuliakoornissamut upalungaarsimanermik suliaqartumut angisuumut, aamma Global Response Network-imik taaneqartartumi ilaasortaasumut, isumaqatigiissuteqarnermigut. Global Response Network tassaavoq ingerlatseqatigiiffiit uuliakoornissamut upalungaarsimanermik suliaqartut annertunerusut, nunarsuaq tamakkerlugu suliaqartuusut aammalu annertoorujussuarmik uuliakoortoqarnerani imminnut ikioqatigiittartut kattuffiat.

Atortunut paasisimasaqartullu ingerlatseqatigiiffiit upalungaarsimanermik suliaqartut namminersortut attaveqatigiiffii aamma Kalaallit Nunaanni ingerlatseqatigiiffik uuliakoornissamut upalungaarsimanermik suliaqartoq GOSR aqutugalugit pissarsiarineqartinnaasunut, pisinnaatitsissummik pigisaqartup upalungaarsimanermut pilersaarutaani ilaasussamut ilassutigalugu, Issittumi suleqatigiinnissamut isumaqatigiissummi periarfissiisoqarpoq.

Taamatut oqaaseqarlunga siunnersuut Inatsisartuni kajumittumik suliarineqarnissaanut tunniuppara.